

**BOSNA I HERCEGOVINE
FEDERACIJA BOSNE I HERCEGOVINE
PARLAMENT FEDERACIJE BIH
DOM NARODA
VEĆINA DELEGATA U KLUBU BOŠNJAKA**

Bosna i Hercegovina
Federacija Bosne i Hercegovine
**PARLAMENT FEDERACIJE
SARAJEVO**

Primljeno:	12-04-2024		
Org. jed.	Broj	Priloga	Vrijednost
01,02	-01-	863	24

**PARLAMENT FEDERACIJE BIH
DOM NARODA**

n/r Tomislav Martinović, predsjedavajući,
n/r Nezim Alagić, potpredsjedavajući,
n/r Slađan Ilić, potpredsjedavajući

**PARLAMENT FEDERACIJE BIH
PREDSTAVNIČKI DOM**

n/r Mirjana Marinković-Lepić, predsjedavajuća,
n/r Mladen Bošković, potpredsjedavajući,
n/r Edina Gabela, potpredsjedavajuća

PREDMET: Prijedlog amandman na Ustav Federacije Bosne i Hercegovine, *dostavlja se*

Na osnovu čl. 217. i 218. Poslovnika Doma naroda Parlamenta Federacije BiH („Službene novine Federacije Bosne i Hercegovine“ broj: 27/03, 21/09 i 24/20) većina delegata u Klubu Bošnjaka u Domu naroda Parlamenta Federacije Bosne i Hercegovine, kao ovlašteni predlagač, podnosi obrazložen Prijedlog amandman na Ustav Federacije Bosne i Hercegovine.

Tražimo da Prijedlog amandmana na Ustav Federacije BiH, shodno članu 218. Poslovnika Doma naroda Parlamenta Federacije Bosne i Hercegovine, odnosno shodno članu 219. Predstavničkog doma Parlamenta Federacije BiH dostavite na razmatranje subjektima ovlaštenim za davanje mišljenja na Prijedlog amandmana i provedete daljnju propisanu proceduru. Uvažavajući rok za stupanje na snagu amandmana na Ustava F BiH koji je određen amandmanom koji je sastavni dio odluke visokog predstavnika od 27.04.2023. godine tražimo hitnost u postupanju po ovom Prijedlogu amandmana na Ustav F BiH.

Obrazloženje

Visoki predstavnik u Bosni i Hercegovini, Christian Schmidt je donio Odluku kojom se deblokira imenovanje Vlade Federacije Bosne i Hercegovine broj: 09/23 od 27.04.2023. godine („Službene novine Federacije BiH“ broj: 31/23).

Sastavni dio Odluke predstavlja amandman na Ustav Federacije BiH koji će, shodno članu 3. Odluke, stupiti na snagu 01.05.2024. godine „pod uvjetom da prije tog datuma Parlament Federacije BiH ne odluči drugačije putem donošenja amandmana na Ustav Federacije BiH u skladu s odredbom stav (1) ovog člana“.














Uvažavajući činjenicu da je članom 3. stav (1) pomenute Odluke propisano da će se Parlament Federacije Bosne i Hercegovine **maksimalno potruditi da pokrene postupak donošenja amandmana** na član IV.B 5. Ustava Federacije BiH koji bi omogućio da nadležne institucije u Federaciji BiH ispoštuju svoju obavezu da osiguraju da Vlada F BiH bude izabrana, kao i činjenicu da predsjednik Federacije BiH (uz saglasnost sa potpredsjednicima Federacije BiH), a niti Vlada Federacije BiH, kao ovlaštene predlagači za podnošenje amandmana na Ustav FBIH, nisu preduzeli bilo kakve radnje kojima bi na kredibilan način potvrdili da su se „maksimalno potrudili“ da pokrenu postupak donošenja amandmana na član IV.B.5. Ustava Federacije BiH, Klub Bošnjaka u Domu naroda Parlamenta Federacije BiH podnosi obrazložen Prijedlog amandmana na Ustav Federacije BiH.

Istovremeno, većina delegata u Klubu Bošnjaka u Domu naroda Parlamenta Federacije BiH podsjeća na činjenicu da nije realizovan zaključak Predstavničkog doma Parlamenta F BiH koji je usvojen na 5. vanrednoj sjednici Predstavničkog doma koja je održana 06.04.2023. godine koji glasi: **“Predstavnički dom Parlamenta FBIH zadužuje Ustavnu komisiju ovog Doma da u skladu s propisanom nadležnošću u članu 57. Poslovnika Predstavničkog doma, u roku od 15 dana, razmotri postojeći ustavni sistem i inicira usklađivanje i/ili izmjenu i dopunu ustavnih odredbi za izbor Vlade Federacije Bosne i Hercegovine nakon promjena koje su nastale donošenjem amandmana na Ustav Federacije Bosne i Hercegovine od strane visokog predstavnika za Bosnu i Hercegovinu Christiana Schmidta, a radi postizanja trajnog ustavnog rješenja koje će omogućiti imenovanje Vlade Federacije Bosne i Hercegovine sadašnjem kao i svakom narednom sazivu Parlamenta Federacije Bosne i Hercegovine“.**

S obzirom da Ustavna komisija Predstavničkog doma nije sačinila i prema predlagačima ovlaštenim za predlaganje amandmana na Ustav FBIH dostavila inicijativu za izmjene i dopune Ustava FBIH u vezi sa budućim imenovanjem Vlade FBIH, većina delegata u Klubu Bošnjaka u Domu naroda Parlamenta Federacije BiH cijeni ukazati na neophodnost pokretanja postupka utvrđivanja odgovornosti zbog neizvršenja naprijed navedenog zaključka Predstavničkog doma Federacije BiH. Neizvršenje pomenutog zaključka negativno se odrazilo na ispunjenje obaveze Parlamenta Federacije BiH koja je utvrđen odlukom visokog predstavnika od 27.04.2023. godine.

Prilog:

- Obrazložen Prijedlog amandmana na Ustav Federacije BiH; Zapisnik sa 5. vanredne sjednice Predstavničkog odma Parlament Federacije BiH na kojoj je usvojen Zaključak broj: 01-02-1241/23 od 06.04.2023. godine.

R. BR.	PREZIME I IME	POTPIS
1.	ALIĆ SENAD	
2.	BAŠIĆ MIRNES	
3.	ČOLAKOVIĆ FAHRUDIN	
4.	DELIĆ ELDIN	
5.	HODŽIĆ HIKMET	
6.	MAHMIĆ MEHMED	
7.	MEMIDŽAN IRMA	
8.	MEMIŠEVIĆ MEHMED	
9.	OBUĆA AIDA	
10.	ŠIŠIĆ DAMIR	
11.	ZAHIRAGIĆ HARIS	
12.	ZUKIĆ MUAMER	
13.	ORLOVIĆ AMIR	
14.		
15.		

Sarajevo, 12. 04. 2024. god.

PRIJEDLOG

AMANDMAN NA USTAV

FEDERACIJE BOSNE I HERCEGOVINE

Ustav Federacije Bosne i Hercegovine ("Službene novine Federacije Bosne i Hercegovine", br. 1/94, 1/94, 13/97, 13/97, 16/02, 22/02, 52/02, 52/02, 63/03, 9/04, 20/04, 33/04, 71/05, 72/05, 32/07, 88/08, 79/22, 80/22 i 31/23) mijenja se i glasi:

Amandman CXXXI

U članu IV.B.5, stavovi (1) i (2) mijenjaju se glase:

(1) Predsjednik Federacije će, nakon konsultacija sa predsjedavajućim i potpredsjedavajućim oba doma, predsjednicima klubova i potpredsjednicima Federacije, odrediti mandataru za sastav Vlade koji ima vjerodostojne šanse da dobije podršku u Predstavničkom domu Parlamenta Federacije. Mandatar je u roku od 15 dana dužan izvijestiti predsjednika o formiranju Vlade koju bi, ukoliko je bude imenovao predsjednik Federacije uz saglasnost oba potpredsjednika Federacije u skladu sa stavom (2) ovog člana, mogla podržati većina u Predstavničkom domu.

(2) Vladu Federacije imenuje predsjednik Federacije uz saglasnost oba potpredsjednika Federacije, u roku od 30 dana od dana izbora predsjednika i dva potpredsjednika. Vlada Federacije Bosne i Hercegovine će biti izabrana nakon što je njeno imenovanje potvrdio većinom glasova Predstavnički dom Federacije.

Nakon stava (2), dodaju se novi stavovi (3) do (7), koji glase:

(3) Ukoliko predsjednik Federacije ne uspije imenovati Vladu Federacije uz saglasnost oba potpredsjednika Federacije u skladu sa stavom (2) ovog člana, predsjednik će dobiti dodatni rok od 30 dana da ponovi postupak predviđen u prva dva stava ovog člana.

(4) Ukoliko predsjednik Federacije ponovo ne uspije imenovati Vladu Federacije uz saglasnost oba potpredsjednika Federacije u skladu sa stavom (3) ovog člana, Vlada koju predloži predsjednik Federacije uz saglasnost jednog potpredsjednika prosljeđuje se Parlamentu Federacije. Ovako predložena Vlada smatra se izabranom ukoliko bude potvrđena većinom glasova u Predstavničkom domu.

(5) Svako upražnjeno mjesto popunjava se u skladu s postupkom predviđenim u stavovima (2) i (4) ovog člana, ukoliko zakonom nije drukčije predviđeno.

(6) Ukoliko Vlada ne bude izabrana u skladu sa stavom (4) ovog člana, predsjednik Federacije, uz saglasnost potpredsjednikâ Federacije, ponovo će postupiti u skladu sa stavom (2) ovog člana.

(7) Ukoliko Vlada ne bude imenovana u skladu sa stavom (6) ovog člana, ili ukoliko Vladu imenovanu u skladu sa tim stavom ne potvrdi Predstavnički dom, izuzetno od odredbi člana IV.A.16, stav (1), Parlament Federacije i kantonalne skupštine će se smatrati raspuštenim. Prijevremeni izbori će biti raspisani u skladu s Izbornim zakonom BiH za Predstavnički dom Federacije i za kantonalne skupštine. Mandat predsjednika i dva potpredsjednika Federacije prestaje njihovim smjenjivanjem nakon ovih prijevremenih izbora.

Dosadašnji stav (3) postaje stav (8).

OBRAZLOŽENJE

I USTAVNI OSNOV

Na osnovu člana IV.A.7.20 Ustava Federacije Bosne i Hercegovine i člana VIII.1.(1) koji je izmjenjen Amandmanom L na Ustav Federacije Bosne i Hercegovine, Parlament Federacije ima isključivu nadležnost da usvaja amandmane na Ustav Federacije Bosne i Hercegovine.

U stavu (1) Amandmana L na Ustav Federacije Bosne i Hercegovine, a kojim je izmjenjen član VIII.1.(1) Ustava Federacije Bosne i Hercegovine i u članovima 217. i 218. Poslovnika o radu Doma naroda Parlamenta Federacije Bosne i Hercegovine (Službene novine Federacije BiH 27/03; 21/09; i 24/20) propisano je da *„Amandmane na Ustav može predlagati predsjednik Federacije, u saglasnosti sa potpredsjednicima, Vlada Federacije, većina delegata u Zastupničkom domu ili većina bošnjačkih, hrvatskih i srpskih delegata u Domu naroda.“*

II RAZLOZI ZA USVAJANJE

Visoki predstavnik međunarodne zajednice za Bosnu i Hercegovinu (dalje: VP) dana 27.aprila 2023.godine donio je akt *„Odluka kojom se deblokira imenovanje Vlade Federacije Bosne i Hercegovine“* (dalje:Odluka). U članu 3 stav(1) odluke propisan je „cilj“ odnosno „rezultat“ čije se postizanje očekuje. U konkretnom slučaju od zakonodavca u Federaciji Bosne i Hercegovine se traži da izmjeni član IV.B.5 Ustava Federacije na način kojim će osigurati prohodnost izbora Vlade Federacije kroz Parlament Federacije.

U članu 3 stav (2) Odluke, propisano je da će Amandman CXXXI na Ustav Federacije koji se nalazi u prilogu Odluke od 27.aprila 2023.godine, stupiti u pravnu snagu 1.maja 2024.godine, pod uslovom da prije dospjeća Parlament Federacije ne usvoji Amandman na Ustav Federacije, a kojim će se riješiti pitanje prohodnosti izbora Vlade Federacije BiH. Preciznije kazano, da Parlament Federacije iznađe, ako može bolje rješenje od onog kojeg je predložio VP.

Amandman CXXXI koji je prilog Odluke, sadrži suspenzivni ili odgodni uslov koji kaže da će on stupiti u pravnu snagu 1.maja 2024.godine ali ukoliko Parlament Federacije ne usvoji Amandman na Ustav Federacije kojim će izmjeniti član IV.B.5 Ustava Federacije.

U članu 1. Evropske konvencije za zaštitu ljudskih prava i osnovnih sloboda, propisana je obaveza svim državama ugovornicama da svim licima pod svojom jurisdikcijom osiguraju prava i slobode koje su utvrđene konvencijom i njenim protokolima. U vezi sa time postoji i obaveza država ugovornica da u okviru domaćeg pravnog poretka osiguraju zaštitu svim licima od arbitratnog mješanja u prava koja su im garantovana konvencijom, a što podrazumijeva primjenu principa pravne sigurnosti.

Princip pravne sigurnosti sadržan je u pravima koja garantuje Evropska konvencija za zaštitu ljudskih prava i osnovnih sloboda. **Između ostaloga, princip pravne sigurnosti znači da svi zakoni država u kojim je Konvencija u pravnoj snazi moraju biti jasni, precizni i predvidljivi tako da svaki građnin zna kako će se zakoni primjeniti u svakoj pojedinačnoj situaciji.** Također legitimno očekivanje koje se odnosi na očekivanje građanina da svi budu jednako tretirani pred zakonom neodvojivi je dio principa pravne sigurnosti i zajedno sa jasnim, preciznim i predvidljivim propisom čini gradivno tkivo vladavine prava i nosivi je stub demokratskog društva. Prema pravnom shvatanju OSCE-a ...koncept (pravne sigurnosti) u prvi plan stavlja važnost konstituisanja društva zasnovanog na vladavini prava, a u interesu pravne sigurnosti i predvidljivosti“

Evropska kontinentalna pravna tradicija u svojim generalnim principima pravne sigurnosti zahtjeva da svi zakoni budu dovoljno precizni, jasni i da omoguće građanima da predvide način na koji će pravni propis biti primjenjen i eventualnu pravnu posljedicu njegove radnje. Zadatak pravne sigurnosti je da omogući građanima da prate zakonske odredbe i da se ponašaju sukladno njima i da zaštiti građane od proizvoljnog tumačenja zakona od strane vlasti.

Ustavni i pravni poredak počiva na pravnoj sigurnosti, a u temelje pravna sigurnosti ugrađena je predstavnička demokratija i neposredni izbori kao osnovni alata u svakom demokratskom društvu. Građani, na izborima prenose dio vlastitog suvereniteta na svoje izabrane predstavnike, a koji dalje treba da u njihovom najboljem interesu usvajaju zakone, Ustav i donose sve potrebne odluke. Dakle, predstavnička demokratija i odlučivanje u Parlamente Federacije Bosne i Hercegovine nemaju alternativu.

U vezi sa svim prethodno navedenim, djelimo uvjerenje da samo i isključivo u Parlamentu Federacije, trebaju ali i moraju da se donose sve bitne odluke za građane. Posebno, kada se radi o izmjenama Ustava Federacije kao najvišeg pravnog akata.

Visoki predstavnik je u Odluci od 27.aprila 2023.godine naveo *„Parlament Federacije će se maksimalno potruditi da pokrene postupak donošenja amandmana na član IV.B.5. Ustava Federacije BiH koji bi, ukoliko bude usvojen u skladu s članom VIII.1. Ustava Federacije BiH, mogao omogućiti da će nadležne institucije u Federaciji ispoštovati svoju obavezu da osiguraju da Vlada Federacije bude izabrana.“*

Dakle, obaveza Parlament Federacije Bosne i Hercegovine je bila (i još uvijek je) da preduzme sve potrebne mjere i radnje sa ciljem usvajanja predmetog Amandmana i ispunjavanja obaveze iz Odluke visokog predstavnika od 27.aprila 2023.godine. Međutim, to trenutka podnošenja ovih amandmana Parlament Federacije nije izvršio obavezu iz Odluke visokog predstavnika, niti je poduzeo potrebne mjere i radnje iz kojih bi se mogao izvesti zaključak da je barem i pokušano.

Podsjećamo da je 06.04.2023.godine Predstavnički dom usvojio zaključak sa 63 glasa ZA kojim je obavezana Ustavna komisija Predstavničkog doma da pripremi i u proceduru dostavi amandman na Ustav Federacije BiH, ali Ustavna komisija tu obavezu nije izvršila.

Radi svih razloga prethodno navedenih, a sa ciljem ispunjavanja vlastite Ustavne obaveze prema građanima i obaveze iz Odluke visokog predstavnika od 27.aprila 2023.godine, većina delegata u Klubu Bošnjaka u Domu naroda Parlamenta Federacije Bosne i Hercegovine podnosi naslovljeni Amandman CXXXI radi razmatranja i odlučivanja.

III OBRAZLOŽENJE POJEDINAČNIH PRAVNIH RJEŠENJA

Amandman CXXXI (dalje: Amandman) mjenja i dopunjuje član IV.B.5 Ustava Federacije Bosne i Hercegovine (dalje:Ustav) na način da mjenja stav (1) i dodaje nove stavove (3), (4), (5), (6) i (7).

U stavu (1) Amandan uvodi pojam “mandatara” za sastav Vlade Federacije, što je samo po sebi važno, međutim, sa ustavno pravne i političke procese od posebne je važnosti procedura imenovanja mandatra. Sa time u vezi u prve dvije alineje stava (1) propisano je da će predsjednik Federacije, nakon konsultacija sa potpredsjednicima Federacije, predsjedavajućim i potpredsjedavajućim oba doma i predsjednicima klubovaa, odrediti mandatara.

Značaj sadržaja ove odredbe ogleda se u tome što obavezuje da se prije izbora mandataru moraju konstituisati oba doma Parlamenta Federacije, da mora biti izabrano rukovodstvo Federacije tj.predsjednik i dva potpredsjednika Federacije i tek nakon toga se može pristupiti određivanju mandataru za sastav vlade. Ovim se dakle uvodi jasan i precizan redosljed u postupku formiranja vlasti u Federaciji i obavezuje sve parlamentarne stranke da formiranje izvršne vlasti može da počne tek nakon što bude okončan izborni proces.

Dalje u stavu (1) propisano je da će mandatar biti lice koje ima “vjerodostojne šanse” da dobije podršku u Predstavničkom domu Parlamenta Federacije, a što je razumno i što je općenito praksa u demokratskim društvima. Na ovaj način bi mandatar “demonstrirao” da ima potrebnu podršku i da će biti potvrđen.

Obaveza mandataru je da u roku od 15 dana od dana kada bude imenovan za mandatara izvjesti Predsjednika Federacije o formiranju Vlade Federacije, a kako bi Predsjednik uz saglasnost oba potpredsjednika Federacije mogao da imenuje Vladu Federacije i pošalje je na potvrđenje u Predstavnički dom Parlamenta Federacije

U stavu (2) Amandmana propisano je da Vladu Federacije imenuje predsjednik Federacije uz saglasnost oba potpredsjednika Federacije u roku od 30 dana od dana izbora predsjednika i dva potpredsjednika Federacije. Vladu Federacije potvrđuje Predstavnički dom Parlamenta Federacije. U stavu (2) nema promjena u odnosu na trenutno važeće odredbe.

Stav (1) i (2) Amandmana zaokružuju cjelinu jednog konsocijativnog mehanizma, u ovom slučaju supotpisa. Ovo je ustavno i praktično najjednostavniji put imenovanja Vlade Federacije.

U stavu (3) Amandmana propisano je da će u okolnostima da predsjednik Federacije uz saglasnost oba potpredsjednika Federacije ne imenuje Vladu Federacije u roku od 30 dana, dobiti dodatnih 30 dana da ponovi postupak iz stava (1). Suština ove odredbe jeste u tome da se prije “slabljenja” konsocijativnog mehanizma supotpisa i otvaranja mogućnosti preglasavanja, ostavi još jedna mogućnost da se postigne konsenzus.

U stavu (4) Amandmana propisano je da ukoliko predsjednik Federacije ne uspije ni nakon dodatnih 30 dana imenovati Vladu Federacije uz saglasnost oba potpredsjednika Federacije, Odluka o imenovanju Vlade Federacije koju su podržali predsjednik i jedan potpredsjednik Federacije ide na potvrđivanje u Predstavnički dom Parlamenta Federacije BIH. Vlada Federacije, imenovana na ovaj način, smatra će se izabranom, ukoliko je podrži većinom glasova Predstavnički dom Parlamenta Federacije.

U vezi sa navedenim pravnim rješenjem, podsjećamo na pravno shvatanje Evropskog suda za ljudska prava koji je u vlastitoj praksi, a u vezi sa članom 3 Protokola broj 1 uz Evropsku konvenciju za zaštitu ljudskih prava i osnovnih sloboda utvrdio da ***“..demokratija predstavlja osnovni element „evropskog javnog poretka”, a prava zajamčena članom 3. Protokola broj 1 Evropske konvencije ključna su za uspostavljanje i održavanje temelja učinkovite i svrsishodne demokratije koja se rukovodi vladavinom prava “***

... „... postoji mnogo načina organizacije i održavanja izbora i različitih izbornih sistema, kao i mnogo razlika između njih, počev od inter alia razlika , historijskog razvoja, kulturoloških i političkih razlika širom Evrope, a sve njih države ugovornice obavezne su ugraditi u svoju demokratsku viziju.“ _ (Presuda Evropskog suda za ljudska prava - „Podkolzina protiv Latvije No.46726/99 od 9.aprila 2002.godine

Nastavno na prednje navedeno podsjećmo da je u članu I/2. Ustava Bosne i Hercegovine propisano je "Bosna i Hercegovina je demokratska država koja funkcioniše u skladu sa zakonom i na osnovu slobodnih i demokratskih izbora.". Ustavni sud Bosne i Hercegovine je u vlastitoj sudskoj praksi zauzeo pravno shvatanje koje se odnosi na tumačenje citiranih odredi člana I/2 Ustava Bosne i Hercegovine.

U tački 116. Treće djelomične Odluke u predmetu U-5/98 Ustavni sud Bosne i Hercegovine ističe da „Politička prava, posebno izborna prava uključujući i pravo da kandidiranja, su osnovna prava s obzirom da sežu u srce demokratske, odgovorne vlade koja se zahtijeva odredbama Preambule, alineja 3, i članom I/2. Ustava BiH i odgovarajućim odredbama Evropske konvencije o ljudskim pravima i ostalih međunarodnih instrumenata navedenih u Aneksu I Ustava BiH. „

Iz citirane prakse Ustavnog suda Bosne i Hercegovine izvodi se jasan i nedvosmislen zaključak da je u odredbama člana I/2 Ustava Bosna i Hercegovina sadržano demokratsko načelo koje određuje Bosnu i Hercegovinu kao demokratsku državu u kojoj su slobodni, fer i demokratski izbori izdignuti na nivou ustavnog načela.

U vezi sa svim prethodno navedenim, zaključujemo, da nas demokratsko načelo iz člana I/2 Ustava Bosne i Hercegovine i demokratska vizije iz prakse Evropskog suda za ljudska prava obavezuju da se potvrđivanje Odluke o imenovanju Vlade Federacije Bosne i Hercegovine može izvršiti samo i isključivo u Predstavničkom domu Parlamenta Federacije Bosne i Hercegovine. Dakle, u domu građana u koji su zastupnici neposredno birani i u kojem postoji najveća koncentracija demokratskog kapaciteta.

U stavu (5) Amandmana propisano je da će sa upražnjena mjesta u Vladi Federacije biti popunjavana na način propisan u stavu (2) i (4) ukoliko zakonom nije drugačije propisano.

U stavu (6) Amandmana propisano je vraćanje na početak procedure, to jeste da se daje novi rok u trajanju do 30 dana, a u unutar kojeg Odluka o imenovanju Vlade Federacije treba biti donesena uz saglasnost predsjednika i dva potpredsjednika Federacije Bosne i Hercegovine. U pravnom smislu povratak sa oslabljenog na punopravni konsocijativni mehanizam ne bi imalo logički smisao, međutim daje mu ga stav (7) u kojem je propisano raspustašnje Parlamenta Federacije i svih kantonalnih skupština.

U stavu (7) Amandmana propisano je da će Parlament Federacije Bosne i Hercegovine i sve kantonalne skupštine biti raspuštene i da će mandat predsjednika i oba potpredsjednika Federacije prestati, ukoliko ili Vlada Federacije ne bude imenovana od strane predsjednika i oba potpredsjednika Federacije sukladno stavu (6) tj. u novom roku od 30 dana ili ukoliko sukladno stavu (6) Predstavnički dom ne potvrdi Odluku o imenovanju Vlade Federacije koju su potpisali predsjednik Federacije i dva potpredsjednik Federacije. Prijevremeni izbori bit će raspisani sukladno odredbama Izbornog zakona Bosne i Hercegovine.

IV FINANSIJSKA SREDSTVA

Nisu potrebna dodatna finansijska sredstva.

Z A P I S N I K
5.VANREDNE SJEDNICE PREDSTAVNIČKOG DOMA PARLAMENTA FEDERACIJE
BIH, održane 06.04.2023. godine

Sjednica je počela u 14.20

Sjednicom je predsjedavala potpredsjedavajuća Edina Gabela

Potpredsjedavajuća Gabela pozdravila je zastupnice i zastupnike, goste kao i predstavnike akreditiranih medijskih kuća koji prate rad sjednice.

Izostanak su opravdali: Maja Uremović i Antonio Sesar.

Prema evidenciji Stručne službe, potpredsjedavajuća je konstatovala da sjednici prisustvuje dovoljan broj zastupnika za kvalitetan rad i odlučivanje.

Prije nego se krenulo sa radom, bilo je potrebno izvršiti verifikaciju mandata novom zastupniku. Ispred Mandatno – imunitetne komisije dodatno obrazloženje dao je Hajrudin Žilić. Mandatno-imunitetska komisija Predstavničkog doma Parlamenta Federacije Bosne i Hercegovine je na sjednici, održanoj 06.04.2023. godine razmatrala verifikaciju mandata zastupniku u Predstavničkom domu Parlamenta Federacije BiH Marijanu Marjanoviću, a budući da je Lidija Bradara stupila na novu dužnost.

U raspravi niko nije učestvovao.

Sa 81 glasom za, bez glasova protiv i bez uzdržanih glasova, usvojen je izvještaj Mandatno-imunitetne komisije i time verificiran mandat novoizabranom zastupniku Marijanu Marjanoviću.

Novoizabrani zastupnik dao je svečanu izjavu.

Klub Zastupnika SBiH tražio je pauzu 30 minuta.

Nakon pauze Admir Čavalić, obrazložio je razloge traženja pauze i kazao da su bile potrebne dodatne konsultacije vezane za pristigle inicijative i deklaracije.

Budući da nije bilo prijavljenih za zastupnička pitanja, prešlo se na utvrđivanje dnevnog reda.

Klub zastupnika DF dostavio je Inicijativu za izmjene Ustava Federacije Bosne i Hercegovine. Dodatno obrazloženje dao je Mahir Mešalić.

Klub zastupnika SDA dostavio je Deklaraciju Predstavničkog doma Parlamenta FBiH o neprihvatanju najavljenog prijedloga OHR-a za izmjene Ustava Federacije BiH i drugih zakonskih ili podzakonskih akata, sa ciljem produbljenja etničkih podjela i diskriminacije kroz izborni proces. Dodatno obrazloženje dao je Mirsad Zaimović.

Na osnovu pojedinačnog izjašnjanja, nije usvojena Inicijativa za izmjene Ustava Federacije Bosne i Hercegovine, koju je predložio Klub zastupnika DF (38 glasova za, 22 glasa protiv i 32 uzdržana glasa).

Potpredsjedavajuća Edina Gabela pročitala je prijedlog dnevnog reda za sjednicu. U raspravi su učestvovali: Nezir Pivić, Mirsad Zaimović, Sanel Kajan, Elvir Karajbić, Salko Zildžić, Jasmina Bišćević-Tokić i Begajeta Čaušević.

Data je pauza od pet minuta.

Nakon kratke pauze, nastavljena je diskusija u kojoj su učestvovali: Ivica Šarić, Adnan Delić, Salko Zildžić, Damir Nikšić, Arnel Isak, Melika Mahmutbegović, Mario Karamatić, Alma Kratina i Mahir Mešalić.

Potpredsjedavajuća je pozvala zastupnika da se izjasne o dnevnom redu sjednice. Na osnovu pojedinačnog izjašnjanja, sa 53 glasa za, 12 glasova protiv i tri uzdržana glasa, usvojen je

DNEVNI RED

1. Informacija o predmetu broj 01-02-152-04/23 od 05.04.2023. godine - Odluka o imenovanju premijera/predsjednika Vlade, zamjenika premijera/predsjednika Vlade i ministara u Vladi Federacije BiH.

- 1. Informacija o predmetu broj 01-02-152-04/23 od 05.04.2023. godine - Odluka o imenovanju premijera/predsjednika Vlade, zamjenika premijera/predsjednika Vlade i ministara u Vladi Federacije BiH.**

Nakon usvajanja dnevnog reda, u diskusiji su učestvovali: Mahir Mešalić, Salko Zildžić i Mario Karamatić.

Nakon diskusije, potpredsjedavajuća je napomenula da je predsjednica Federacije BiH Lidija Bradara 05.04.2023. godine dostavila dopis broj 01-02-152-04/23 – Odluka o imenovanju premijera/predsjednika Vlade, zamjenika premijera/predsjednika Vlade i ministara u Vladi Federacije BiH, kojim je obavijestila o nesuglasicama prilikom imenovanja Vlade Federacije BiH.

Predsjednica Federacije BiH Lidija Bradara obratila se zastupnicima. Zastupnicima su se obratili i potpredsjednici Federacije BiH Igor Stojanović i Refik Lendo.

U raspravi su učestvovali: Damir Nikšić, Mahir Mešalić, Mario Karamatić, Mirsad Zaimović, Dennis Gratz, Salko Zildžić, Damir Mašić, Adnan Delić i Almedin Aliefendić. Pauza 15 minuta.

Nakon pauze, nastavljena je diskusija u kojoj su učestvovali: Damir Mašić, Mahir Mešalić, Adnan Delić, Mladen Bošković, Alma Kratina, Salko Zildžić, Slaven Raguž, Hamdija Abdić, Haris Šabanović i Dennis Gratz.

Potpredsjedavajuća je dala pauzu do 20.15.

Nakon pauze nastavilo se sa diskusijom, u kojoj su učestvovali: Mahir Mešalić, Nezir Pivić, Mario Karamatić, Eldar Čomor, Salko Zildžić i Almedin Aliefendić.

Predstavnički dom primio je k znanju Informaciju o predmetu broj 01-02-152-04/23 od 05.04.2023. godine - Odluka o imenovanju premijera/predsjednika Vlade, zamjenika premijera/predsjednika Vlade i ministara u Vladi Federacije BiH.

Klub zastupnika NES i SBiH predložili su zaključak, kojeg je obrazložio Mirza Batalović. Sa 63 glasa za, 13 glasova protiv i četiri uzdržana glasa, usvojen je sljedeći:

ZAKLJUČAK

Predstavnički dom Parlamenta FBiH zadužuje Ustavnu komisiju ovog Doma da u skladu s propisanom nadležnošću u članu 57. Poslovnika Predstavničkog doma, u roku od 15 dana, razmotri postojeći ustavni sistem i inicira usklađivanje i/ili izmjenu i dopunu ustavnih odredbi za izbor Vlade Federacije Bosne i Hercegovine nakon promjena koje su nastale donošenjem amandmana na Ustav Federacije Bosne i Hercegovine od strane visokog predstavnika za Bosnu i Hercegovinu Christiana Schmidta, a radi postizanja trajnog ustavnog rješenja koje će omogućiti imenovanje Vlade Federacije Bosne i Hercegovine sadašnjem kao i svakom narednom sazivu Parlamenta Federacije Bosne i Hercegovine.

Klub zastupnika SDA predložio je deklaraciju. U diskusiji su učestvovali: Damir Mašić, Slaven Raguž i Mahir Mešalić.

Na osnovu pojedinačnog izjašnjavanja, sa 50 glasova za, 17 glasova protiv i 15 uzdržanih glasova, usvojena je:

Deklaracija Predstavničkog doma Parlamenta FBiH o neprihvatanju najavljenog prijedloga OHR-a za izmjene Ustava Federacije Bosne i Hercegovine i drugih zakonskih i podzakonskih akata sa ciljem produbljivanja etničkih podjela i diskriminacije kroz izborni proces

Pozivajući se na Univerzalnu deklaraciju Ujedinjenih nacija o ljudskim pravima, Evropsku konvenciju o zaštiti ljudskih prava i sloboda sa Protokolima, članove I, V i X Općeg okvirnog sporazuma za mir u Bosni i Hercegovini, te njegov Aneks 1B (sporazum o regionalnoj stabilizaciji) i Aneks 4 (Ustav Bosne i Hercegovine), Aneks 7 (Izbjeglince i raseljena lica), Ustav Federacije Bosne i Hercegovine i Zakon o zabrani diskriminacije u Bosni i Hercegovini, Uvažavajući i afirmirajući presude Evropskog suda za ljudska prava u slučajevima Derve Sejdića i Jakoba Fincića protiv Bosne i Hercegovine (br. 27996/06 i 34836/06), Azre Zornić protiv Bosne i Hercegovine (br. 3681/06), Ilijaza Pilava protiv Bosne i Hercegovine (br. 41939/07), Samira Šlakua protiv Bosne i Hercegovine (br. 56666/12) i Svetozara Pudarića protiv Bosne i Hercegovine (br. 55799/18),

Poštujući principe i odredbe Međunarodnog pakta o ekonomskim, socijalnim i kulturnim pravima Ujedinjenih nacija i Međunarodnog pakta o građanskim i političkim pravima Ujedinjenih nacija,

Predstavnički dom Parlamenta Federacije Bosne i Hercegovine usvaja:

Deklaraciju o neprihvatanju najavljenog prijedloga OHR-a za izmjene Ustava Federacije BiH i drugih zakonskih ili podzakonskih akata sa ciljem produbljivanja etničkih podjela i diskriminacije kroz izborni proces

Uzimajući u obzir u Preambuli navedene obavezujuće međunarodne i domaće akte, Predstavnički dom Parlamenta Federacije Bosne i Hercegovine osuđuje kontinuirane tendencije i političke prijedloge i inicijative, bez obzira dolazile one iznutra ili van Bosne i Hercegovine, koje za cilj imaju uspostavu sistema etno-teritorijalne supremacije i obespravljivanja manjinski zastupljenih etničkih grupa na pojedinim dijelovima državne teritorije i teritorije bosanskohercegovačkog entiteta Federacija Bosne i Hercegovine, a koje dugoročno vode do rušenja ustavnog poretka države Bosne i Hercegovine.

Predstavnički dom Parlamenta Federacije Bosne i Hercegovine (u daljem tekstu: Predstavnički dom) poziva sve domaće i međunarodne institucije, a naročito Ured Visokog predstavnika u Bosni i Hercegovini (OHR), vlade država potpisnica Općeg okvirnog sporazuma za mir u Bosni i Hercegovini, te institucije Evropske unije i države članice Vijeća za implementaciju mira u Bosni i Hercegovini, da se suzdrže od poduzimanja svih oblika djelovanja koji predstavljaju kršenje Evropske konvencije o ljudskim pravima i osnovnim slobodama, Općeg okvirnog sporazuma za mir u Bosni i Hercegovini, Ustava Bosne i Hercegovine i Ustava Federacije Bosne i Hercegovine, odredaba Međunarodnog pakta o ekonomskim, socijalnim i kulturnim pravima Ujedinjenih nacija, Međunarodnog pakta o građanskim i političkim pravima Ujedinjenih nacija, te nepoštivanje presuda Evropskog suda za ljudska prava.

Predstavnički dom poziva sve iznad pobrojane institucije da poduzmu sve nužne mjere u skladu sa svojim ovlaštenjima u cilju snaženja institucija države Bosne i Hercegovine na svim nivoima, zaštite individualnih i kolektivnih prava i sloboda građana Bosne i Hercegovine, promovisanja uzajamnosti, pluralnosti i saradnje među građanima različitih individualnih i kolektivnih pripadanja, što naročito podrazumijeva sljedeće:

Predstavnički dom poziva odgovorne institucije, tijela, organe, političke subjekte i pojedince na obustavu, ukidanje i napuštanje svih oblika djelovanja koji potiču na podjelu države Bosne i Hercegovine po principu etno-teritorijalne dominacije različitih grupa na pojedinim dijelovima teritorije države Bosne i Hercegovine kroz nametanje koncepta isključive vladavine i dominacije pojedinih etničkih grupa u postojećim administrativno-teritorijalnim jedinicama države Bosne i Hercegovine, kao i kroz oduzimanje, umanjevanje ili ograničavanje prava

etničkih grupa koje su na određenom dijelu teoritorije Bosne i Hercegovine, njenih entiteta, kantona ili općina/gradova zastupljene u manjinskom omjeru;

Predstavnički dom poziva sve relevantne činitelje unutar evropskog, regionalnog i domaćeg pravno-političkog poretka na poštivanje i neodložnu provedbu presuda Evropskog suda za ljudska prava u slučajevima Derve Sejdića i Jakoba Fincija protiv Bosne i Hercegovine (br. 27996/06 i 34836/06), Azre Zornić protiv Bosne i Hercegovine (br. 3681/06), Ilijaza Pilava protiv Bosne i Hercegovine (br. 41939/07), Samira Šlakua protiv Bosne i Hercegovine (br. 56666/12) i Svetozara Pudarića protiv Bosne i Hercegovine (br. 55799/18) između ostalog, predmetnim presudama je naloženo slijedeće

1. „Sud smatra da se ni jedna vrsta različitog postupanja koja se isključivo ili u kritičnom obimu zasniva na etničkom porijeklu pojedinca ne može objektivno opravdati u savremenom demokratskom društvu koje je izgrađeno na principima pluralizma i poštovanja različitih kultura; Neizjašnjavanje aplikanata o svojoj pripadnosti nekom od „konstituentnih naroda“ onemogućilo ih je da se kandiduju na izborima za Predsjedništvo. Za identičan ustavni preduslov već je ustanovljeno da predstavlja diskriminirajuću razliku u tretmanu koji krši član 14. u odnosu na Dom naroda (vidjeti tačku 50.). Uz to, principe koji se odnose na diskriminaciju zabranjenu članom 14. i članom 1. Protokola br. 12 treba tumačiti na isti način. Slijedi da se ustavne odredbe koje čine aplikante nepodobnim da se kandiduju na izborima za Predsjedništvo također moraju smatrati diskriminatorским i kao takve predstavljaju povredu člana 1. Protokola br. 12, a Sud ne smatra da u tom smislu postoji bilo kakva razlika između Doma naroda i Predsjedništva BiH.“ (tačke 44. i 56. presude u slučaju „Sejdić – Finci“.
2. „U presudi Sejdić i Finci Sud je primijetio da je u vrijeme kada su donesene sporne ustavne odredbe na terenu došlo do vrlo krhkog primirja, te da je cilj tih odredbi bio da se zaustavi brutalni sukob obilježen genocidom i etničkim čišćenjem. Priroda tog sukoba bila je takva da je bilo neophodno pristati na konstituentne narode kako bi se osigurao mir. Međutim sada više od osamnaest godina od završetka tragičnog sukoba ne može postojati bilo kakv razlog za održavanje na snazi spornih ustavnih odredbi. Sud očekuje da će se bez daljnjeg odgađanja uspostaviti demokratsko uređenje. Obzirom na potrebu da se osigura stvarna politička demokratija, Sud smatra da je došlo vrijeme za politički sistem koji će svakom građaninu BiH osigurati pravo da se kandiduje na izborima za Predsjedništvo i Dom naroda BiH, bez diskriminacije po osnovu etničke pripadnosti i bez davanja posebnih prava konstituentnim narodima uz isključivanje manjina ili građana BiH.“ (tačka 43. Presude u slučaju „Zornić, tačka 47. Presude u slučaju „Pilav“ i tačka 40. Presude u slučaju „Šlaku“).
3. „Kada je riječ o argumentu Vlade da se aplikantica može u svako doba izjasniti kao pripadnica jednog od „konstituentnih naroda“, Sud primjećuje da se isto može reći i za pripadnike manjina, poput aplikanata u predmetu Sejdić i Finci kao i za građane bez etničke pripadnosti. Kako je navedeno u tekstu gore nema objektivnih kriterija za nečiju etničku pripadnost (vidjeti tačku 8. u tekstu). To zavisi isključivo od vlastitog samoodređenja osobe. Mogu postojati različiti razlozi da se osoba ne izjašnjava kao pripadnik bilo koje određene grupe poput na primjer mješovitog braka ili roditelja koji su različitog porijekla ili jednostavno da se aplikantica željela izjasniti kao građanka BiH. Iako nije jasno koji su razlozi aplikantice u ovom predmetu, Sud ih u svakom slučaju smatra nebitnim. Aplikantica ne treba biti onemogućena da se kandiduje na izborima za Dom naroda zbog njenog ličnog samoodređenja.“ (tačka 31. presude u slučaju „Zornić“).
4. Iako je pripadnik jednog od „konstituentnih naroda“ aplikant u predmetnom slučaju je isključen iz prava da bude biran za člana Predsjedništva usljed spornog zahtjeva koji se odnosi na prebivalište. Bez obzira na razlike u odnosu na slučaj Sejdić – Finci, Sud smatra da je ova isključenost zasnovana na kombinaciji etničkog porijekla i mjesta prebivališta od kojih oba služe kao osnov za različit tretman koji spada u domen člana

1. Protokola 12, te kao takva predstavlja diskriminirajuće postupanje suprotno članu 1. Protokola broj 12.“ (tačka 48. Presude u slučaju „Pilav“)
5. „Sud napominje da sam Ustav ne uvjetuje izričito osnivanje pasivnog izbornog prava zahtjevom o prebivalištu (vidi tačku 11. ove presude), te da je takav uvjet uveden Izbornim zakonom iz 2001. godine (vidi tačku 12. ove presude). S obzirom na to da se ni jedna odredba domaćeg prava ne može tumačiti ni primjenjivati na način koji nije usklađen sa obavezama države prema Konvenciji, naročito ako bi to bilo nespojivo sa zabranom diskriminacije, a u širem smislu načelima koja su u osnovi Konvencije. Ovo se sigurno može reći za tuženu državu čiji vlastiti Ustav daje Konvenciji prioritet u odnosu na svako drugo pravo.“ (tačka 27. Presude u slučaju „Pudarić“)

S obzirom na navedene odredbe presuda Evropskog suda za ljudska prava, a imajući u vidu činjenicu da je članom II.2 Ustava Bosne i Hercegovine određeno da se prava i slobode predviđeni u Evropskoj konvenciji za zaštitu ljudskih prava i osnovnih sloboda i u njenim Protokolima direktno primjenjuju u Bosni i Hercegovini, te da ovi akti imaju prioritet nad svakim ostalim pravom, što je konstatovano i predmetnim presudama, pozivamo Visokog predstavnika u Bosni i Hercegovini da odustane od nametanja odluke kojom bi bio prekršen Ustav Bosne i Hercegovine, te svih pet iznad navedenih presuda Evropskog suda za ljudska prava, čija implementacija je Ustavom države definirana kao prioritet u odnosu na sve druge pravne akte;

Predstavnički dom poziva OHR i sve potpisnice Općeg okvirnog sporazuma za mir u Bosni i Hercegovini na poštivanje i dosljednu primjenu njegovih odredbi prema kojim su se sve strane obavezale da će „u potpunosti poštovati suverenu jednakost jedna druge, rješavat će sporna pitanja mirnim sredstvima i uzdržat će se od bilo kakvih akcija, putem prijetnje ili upotrebe sile ili na bilo koji drugi način, protiv teritorijalnog integriteta i političke nezavisnosti Bosne i Hercegovine,“ te će, u odnosu na Ustav Bosne i Hercegovine „prihvatiti napravljene aranžmane, u potpunosti poštovati usvojena opredjeljenja i činiti sve da se ona ostvare.“ To podrazumijeva poštivanje prethodnog stava;

Predstavnički dom poziva na dosljednu i potpunu implementaciju Aneksa 7 Općeg okvirnog sporazuma za mir u Bosni i Hercegovini, kojim je između ostalog određeno da će strane „osigurati da se izbjeglicama i prognanicima omogući siguran povratak, bez rizika od uznemiravanja, zastrašivanja, proganjanja ili diskriminacije, naročito zbog njihovog etničkoga porijekla, vjeroispovjesti ili političkoga uvjerenja“, kao i da će „opozvati sve domaće pravne propise i administrativne mjere s diskriminirajućim namjerama ili učincima.“ Posebno ističemo odredbu navedenog Aneksa kojom je precizirano da se strane obavezuju „stvoriti na svojim teritorijima političke, privredne i socijalne uvjete pogodne za dobrovoljan povratak i skladnu reintegraciju izbjeglica i prognanika, bez davanja prednosti nekoj određenoj grupi.“ Pozivamo OHR da u smislu citiranih odredbi poduzme sve kako bi se osigurali politički uvjeti prema kojim se u sredinama naseljenim povratnicima ne daje posebna prednost bilo kojoj određenoj grupi, te da odustane od eventualnih mjera kojim bi se dodatno narušio iznad citirani princip definisan Općim okvirnim sporazumom za mir u Bosni i Hercegovini;

Predstavnički dom poziva na dosljednu primjenu zakonske regulative u Bosni i Hercegovini kojom je zabranjen svaki oblik segregacije i diskriminacije građana, uz poštivanje individualnih i kolektivnih prava i sloboda građana i osiguranje jednake dostupnosti znanja iz oblasti jezika, kulture i naslijeđa svih građana u Bosni i Hercegovini, kao temelja razvoja bosanskohercegovačkog društva kao pluralne, tolerantne društvene zajednice, a pravosudna tijela se pozivaju da najoštrije sankcionišu provoditelje, štíćenike i promotore neustavne prakse segregacije i diskriminacije stanovništva u cijeloj državi Bosni i Hercegovini. Svaki postupak Visokog predstavnika u smjeru intervencije u ustavu, posebno u smislu kršenja navedenih odredbi, izlaženje je izvan okvira njegovih nadležnosti i Aneksa 10 Općeg okvirnog sporazuma za mir u Bosni i Hercegovini;

Predstavnički dom poziva vlasti u Republici Hrvatskoj koje se javno i aktivno miješaju u unutrašnja pitanja Bosne i Hercegovine, te zagovaraju nametanje odluka koje nisu u skladu sa iznad citiranim odredbama presuda Evropskog suda za ljudska prava i Ustava Bosne i Hercegovine čime se produbljuje diskriminacija i krši državni Ustav;

U smislu unapređenja i kreiranja demokratskog okruženja u regiji implementiraju akt Ustavnog suda Republike Hrvatske broj U-X-6472/2010 od 08.12.2010. godine. Navedenim aktom je neustavnom ocijenjena praksa da se iz različitih izbornih jedinica u Sabor Republike Hrvatske bira jednak broj zastupnika kada postoje značajne razlike u broju stanovnika u izbornim jedinicama. Ustavni sud Republike Hrvatske je ocijenio da je osiguranje jednake vrijednosti glasa ustavna obaveza. Osiguranje ravnopravne zastupljenosti u hrvatskom Saboru, odnosno omjera predstavnika iz izbornih jedinica srazmjerno procentu stanovnika koji u njima žive ovisi i zakonitost i „opći demokratski karakter cjelokupnih izbora“, ocijenio je Ustavni sud Republike Hrvatske. Pozivamo vlasti ove susjedne države da učine sve kako bi svojim građanima osigurali jednakopravnost, te da jednake principe kojim je uslovljen „opći demokratski karakter izbora“ unapređuju i izvan svojih granica.

Predstavnički dom Parlamenta Federacije Bosne i Hercegovine zadužuje predsjedavajuću da sa sadržajem Deklaracije upozna Dom naroda Parlamenta FBiH, Parlamentarnu Skupštinu BiH, OHR, Delegaciju EU u BiH, Vijeće za implementaciju mira, Evropski parlament, vlade država Kvinte te da hitno prosljedi tekst Deklaracije Predsjedništvu BiH i Ministarstvu vanjskih poslova BiH sa zahtjevom da ove dvije institucije u skladu sa ustavnim ovlaštenjima ovaj akt upute prema Predsjedniku Republike Srbije, Predsjedniku Republike Hrvatske, Narodnoj skupštini Republike Srbije, Saboru Republike Hrvatske, te o tome informiše Predstavnički dom Parlamenta Federacije BiH.

Klubovi zastupnika HDZ BiH-HNS, SDP, NiP, Naša stranka, NES, SBiH, PDA i BHI-Kasumović Fuad, predložili su zaključke, koje je dodatno obrazložio Adnan Delić.

Na osnovu pojedinačnog izjašnjavanja, sa 52 glasa za, 31 glasom protiv i bez uzdržanih glasova, usvojeni su sljedeći:

ZAKLJUČCI

Predstavnički dom Parlamenta Federacije Bosne i Hercegovine konstatuje da u ustavnom roku od 30 dana od dana izbora predsjednika i dva potpredsjednika Federacije BiH, nije u potpunosti završen proces imenovanja Vlade Federacije BiH kako to nalažu odredbe Ustava Federacije BiH, odnosno nije data saglasnost na Odluku o imenovanju Vlade Federacije BiH kako nalažu rokovi propisani Ustavom Federacije BiH.

Imajući u vidu istaknuto mjesto koje imaju izbori prema Općem okvirnom sporazumu za mir u Bosni i Hercegovini i uložene napore međunarodne zajednice kako bi se osigurala provedba rezultata izbora održanih 02. oktobra 2022. godine, a uvažavajući činjenicu da sadašnja Vlada Federacije BiH radi godinama u "tehničkom" mandatu i nije u mogućnosti predvoditi reformske procese, Predstavnički dom Parlamenta Federacije BiH je opredijeljen da se što prije formira nova Vlada Federacije BiH i poziva sve učesnike u ovom procesu da se hitno iznađe rješenje za ovo pitanje kako bi se ispoštovala ustavnost i zakonitost rada izvršne vlasti u Federaciji BiH.

Potpredsjedavajuća zaključila je rad 5. vanredne sjednice u 21.45.

Transkript i prijepis transkripta čine sastavni dio Zapisnika.

SEKRETAR
PREDSTAVNIČKOG DOMA
PARLAMENTA FEDERACIJE BIH

Ivan Miličević

PREDSJEDAVAJUĆA
PREDSTAVNIČKOG DOMA
PARLAMENTA FEDERACIJE BIH

Mirjana Marinković-Lepić